

17/10/1997

Kejatuhan RM satu ujian

Adihaw Dunia

Kejatuhan nilai mata wang negara akhir-akhir ini banyak menimbulkan kebimbangan di kalangan rakyat Malaysia. Bagi saya masalah yang melanda ini sebenarnya menguji semangat patriotik masyarakat berbilang kaum di negara ini.

Kalau anda ada membaca majalah-majalah ekonomi antarabangsa seperti Time, Asiaweek, ataupun Newsweek, anda pasti akan berbelah bahagi sama ada untuk mempercayai pendapat orang luar atau pemimpin dan kerajaan sendiri.

Mereka yang mengagumi Datuk Seri Dr Mahathir Mohamad pasti menganggap penulis majalah terbabit adalah petualang yang ingin menghancurkan negara dan rakyat berbilang kaum dan bagi yang selama ini menjadi penentang utama kerajaan. Inilah masa yang ditunggu-tunggu untuk menjatuhkan seorang pemimpin Malaysia yang sudah berkuasa selama 16 tahun itu. Bagi yang mengalami kerugian akibat masalah ini pula akan menjadi penentang baru Dr Mahathir setelah beberapa tahun dibuai dengan keuntungan.

Saya pasti Dr Mahathir kecewa dengan sikap dan pendirian sesetengah rakyatnya. Tidakkah manis bagi mereka menikmati kemewahan dan kesenangan hidup secara bermaruah yang telah diusahakan di bawah kepemimpinannya selama ini. Begitu mudah mereka menuding jari kepadanya, seolah-olah dia sendiri ingin meruntuhkan apa yang telah dibinanya.

Adakah kita ingin melihat keadaan itu berlaku di negara ini? Di waktu ini, saya menyeru semua rakyat Malaysia agar sama-sama bersatu berdiri di belakang Dr Mahathir. Kalau bukan untuk Dr Mahathir, lakukanlah ia untuk negara.